

DIARIO Hubentud den movecion

Musica, baile, canto, actuacion, color y alegria=MAGIA!

Musical "Planta awe, cosecha mañan" ta bolbe riba escenario di Cas di Cultura, dia 29 di Juni otro siman

Diaranzon otro siman, esta dia 29 di Juni, Fundacion CCA (Crea, conserva arte y cultura di Aruba), conhuntamente cu Maria College Mavo, ta bolbe presenta e Musical "Planta awe, cosecha mañan".


E Musical lo tuma lugar den Cas di Cultura, di 7.30 pa 9.30 or di anochi.

"Pa peticion di publico en general, lo ripiti e show, y tambe pa mas hoben por bin wak'e. E publico cu a bay caba, a keda asombra pa e calidad di e talentonan artistico riba escenario. Nan a pensa cu ta un musical di scol, pues nan tabata tin otro expectativa, pero ora cu nan a presencia, nan a bisa cu ta parece un musical profesional di Broadway. Loke e publico tambe a goza ta cu tur e canticanan, y e textonan cu a wordo papia, ta den un papiamento crioyo unda cu nan a siña diferente palabra cu nan no tabata sa, aparte di disfruta di e aspecto humoristico di e show. Pues, nan ta bisa cu e tabata un aprendizage pa nan tambe. Y claro, e totalidad, ya cu publico na Aruba no ta custumbra cu musical, pero ora nan ta wak cu tin actuacion, musica, baile, canto, nan a gusta e combinacion y con tur a core cay den otro", Ferdinand a comenta.

PERCEPCION DI E DIRECTOR:

Como director di e musical, Ferdinand a topa cu hobennan cu tabata sa algo di actuacion, baile y canto y cu cada un mester a traha riba nan propio personalidad, pa despues nan a hinca arte den nan mes. Tabata tin mas of menos 50 hoben cu tabata parti di e elenco. A forma gruponan di baile, canto, actuacion, y nan a bin hunto pa forma manera un puzzle.

"Pa mi mes e tabata un reto dificil pa por hinca tur e ingredientenan den otro pero e mesun muchanan, nan energia y gana pa participa, a pone cu tur a colabora y hunto a forma tur loke ta e presentacion. Danki na Ivan Quandus cu a sa di guia y saca tur e bunita parti di nan voz. El a haci e magia cu e voz. El a percura pa e canticanan tin calidad y saca tur e potencial cu e hobennan tabata tin aden. Un danki tambe na Shandra Ashby pa



su tremendo contribucion pa e bailenan y coreografianan espectacular", Ferdinand a expresa.

META DI E FUNDACION:

"Como meta principal di e fundacion ta pa prepara e hobennan pa nan ta lider di diferente disciplina di teatro. E hobennan aki ta bay ta cana banda di mi y ta bay tin tayernan pa asina nan mes siña prepara nan mesun script, obranan, nan mes ta haya suficiente guia pa nan ta instructornan den futuro. Mi ta bay duna nan kico ta

skirbi script pa nan lo bira e futuro directornan, productornan di baile y cualkier show.

Un otro meta fundamental di e Fundacion ta pa rescata e disciplina di teatro di Aruba y pa bin cu diferente genero di teatro. Pasobra hopi hende na Aruba ta pensa cu teatro ta comedia, pero tin hopi mas genero manera drama, tragedia, monologo, mimica, marionette, teatro di improvisacionnan, musical, popenkast, etc., Ferdinand a comenta.

CONCLUSION:



"E ta hopi importante pa hopi publico bin wak e musical den e oportunidad aki, pa haya mas aprecio pa loke ta e disciplina di teatro, crea e sentimentonan cu teatro ta genera na e publico, y e ta duna e refleho di bida. Teatro tin hopi mensahe, y

esey ta loke e publico ta comenta. Mi ta extende un invitacion na henter pueblo di Aruba, pa no perde e oportunidad aki di bin presencia e tremendo musical aki 'Planta awe, Cosecha mañan'", Ferdinand a conclui.